



Sullualuup siunissami aqqusaalutarineqariartuaarnissaa sillimaffigalugu, sapinngisamillu annertunerpaamik periarfissaasinnaasunik atorluaanissaq siunertaralugu nunatsinni international frihavnimik sanaartortoqarlunilu pilersitsisoqassappat suut pitsaaqutaallutillu ajoqutaasinnaanersut Naalakkersuisut nassuiaasiornissaat pillugu Inatsisartut aalajangiiffissaattut siunnersuut. Nassuiaat UKA 2021-mut naammassineqassaaq.

(Atassut Inatsisartutgruppe).

Atassutip inatsisartut gruppiat sullualuup siunissami aqqusaarneqartarnissaa siunertaralugu international frihavnimik sanaartortoqarlunilu pilersitsisoqassappat suut pitsaaqutaallutillu ajoqutaasinnaanerinik Naalakkersuisut nassuiaasiornissaat pillugu siunnersuutaannut Inuit Ataqatigiit imatut oqaaseqaateqassaput:

Issittup soqutigineqaleriartornera ilutigalugu nunatta avammut niuernera annertusiartussasoq piareersimaffigissavarput.

Nunatta avammut niuernera annertusiartortillugu Sullualuup aqquataalersinnaanera naatsorsuutigineqarsinnaavoq. Tamanna piviusunngussappat nunatsinni piareersimasariaqarpugut. Sullualuup siunissami aqqusaarneqartarnera piviusunngussappat international frihavnimillu pilersitsisoqassappat annertuumik aningaasartuuteqartoqassasoq qularutiginnilarput. Taamaattumik nunatsinni international frihavnimik pilersitsisoqassappat inuiaqatigiit aningaasaqarnerannut, niuernikkut, inuussutissarsiutinik ineriartortitsinikkut, sillimaniarnikkut avatangiisitigullu kingunerisassat pillugit qulaajaasoqarnissaa misissuilluartoqaqqaarnissaalu Inuit Ataqatigiit pingaartissavaat.

Sullualuup inuiaqatigiinnut aningaasarsiornikkut iluanaarutaassappat siunissami attaneqarsinnaasumik pilersaarusiortoqarnissaa pinngitsoorneqarsinnaanngilaq. Sullualuup atorluarneqalerneratigut international frihavnimillu pilersitsinikkut aningaasarsiornikkut inuussutissarsiutitigut ineriartuutaasinnaasut suusinnaaneri qulaajaanermi nassuiaasiorneqarnissaat pisariaqassaaq.

Sullualuup siunissami aqqusaarneqartalissappat sillimaffiginiarlugu avatangiisitigut kingunerisassat ilanngullugit misissuiffigilluarneqartariaqarput. Nunarput minguitsoq

INUIT ATAQATIGIIT

Inatsisartuni



avatangiiserlu pisuussutininik uumassusilinnik piniakkanik aalisakkanillu peqarluarnera eqqarsaatigalugu piujuaannartitsinissaq siunertaralugu innarliisoqassanngitsoq Inuit Ataqatigiit oqariartuutigerusuppaat. Sullualuup siunissami angallaffiulernermigut pisuussutit uumassusillit piniagassat aalisakkallu piniartortatsinnit aalisartortatsinnillu toqqammavittut inuussutissarsiutigineqartut qanoq sunnerneqarsinnaaneri pillugit kingunerisinnaasaat ilisimatuussutsikkut sukumiisumik misissuiffigineqartariaqarput. Pisuussutininik uumassusilinnik nunatsinni inuuniuteqarneq suli ukiorpassuarni tulliuuttuni pingaarnerpaajulluni Nunatsinnut isertitsitsissutaasussaavoq. Taamaattumik pisuussutit uumassusillit iluaqutiginiarneri ilisimatuussutsikkut paasisat, innuttaasut ilisimasatoqaat aammalu nunanut allanut isumaqatigissutininik eqquutsitsineq tunngavigalugit piujuartitsisumik aqunneqarnissaat Inuit Ataqatigiit qitiusutut pingaartitaraat.

Sillimaniarnikkut malittarisassat pineqartillugit Sullualuup siunissami sakkutuulersuunnermut aqquasaarneqartassanngitsoq piumasarissavarput. Issittoq nunarsuarmioqatitsinnit isigineqaleriartuinnartillugu nunarpullu pingaarutilimmik inissisimatillugu sakkulersuuffiunnginnissaa pingaaruteqarpoq. Issittoq nunarsuarmioqatigiinni sakkulersorfiussanngilaq.

Taamatut suliaqartoqassappat nunatsinni niuernikkut, inuussutissarsiornikkut, sillimaniarnikkut avatangiisinullu tunngasutigut susasaqartut, minnerunngitsumillu avatangiisitsinnik inuussutissarsiuteqarlutillu isumalluuteqartut aalisartut piniartullu isumaasa oqariartuutaasalu avaqqunneqassanngitsut Inuit Ataqatigiit piumasarivaat.

Taamatut naatsumk oqaaseqarluta siunnersuut ataatsimiititaliamut susasaqartumut ingerlateqqipparput.